

EL SALVADOR, GUATEMALA, HONDURAS ETA NIKARAGUAKO GOBERNUEK LARRIALDIKO LAGUNTZA ESKATU DUTE

‘Mitch’ hurakanak 3.000 hildako inguru utzi ditu Erdialdeko Amerikan

Erdialdeko Amerika 15 egunez astindu duen *Mitch* hurakanak hondamendia eragin du. Lau herrialde horietan ia 3.000 inguru izango dira hildakoak, eta kalte materialak oso handiak. Herrialde horietako gobernuek bat egin dute nazioarteari laguntza eskatzeko. Batik bat, sendagaiak behar dira.

A. Ormaetxea-J.M. Pastor/ Donostia

NIKARAGUAN ez da izendatu larrialdi egoera, baina 2.000 inguru dira hildakoak. *Mitch* hurakanak eragin duen hondamendi larriena Las Casitas munitzako da, Eduardo Romero Managua hiriburuko Udaleko prentsa arduradunak atzo EGUNKARIARI azaldu zionez. «Managua-tik ipar-mendebaldera dagoen sumendiko malda behera etorri zen, 80 metro koadroko loi-lubiaz eraginez. Hiru herrixka azpian harrapatu zituen eta 1.500dik gora dira hildakoak», azpimarratu zuen Romero. Atzo arratsaldean bitartean 70 gorpu inguru atera zituzte loi-azpitik.

Hurakanak 15 egunez astindu du Erdialdeko Amerika, eta tarte horretan hondamendia eragin du. Honduras eta Nikaragua artean muga egiten duen Coco ibaiak gainezka egin zuen eta zubi ugari eraman zituen. Herri asko isolatuta dago.

Managuan, Xoloplan laku ondoan bizi ziren 4.000 bat pertsona daude hiriburuan errefuxiatuentzako egokitutako 25 egoitzetan. Lakuko urak lauzpabost metro egin zuten gora eta etxebizitzak galdu dituzte han bizi zirenek.

«Armada eta sorospen taldeak atzo barneratu ziren arazoak dauden gunetara, eta ezin dugu oraindik biktimen eta kalte materialen kopurua zehaztu», Romerok azaldu zuenez. Erakunde horien iritziz, ordea, hildakoak 2.000tik gora izango dira eta Managuan soilik kalteak dirutan 10 milioi dolarrekoak direla uste da. Uzta asko ere galdu da.

Departamendu kaltetuenak dira: mendebaldean Leon eta Chinandega, eta iparraldean Nueva Segovia, Madriz, Esteli, Jinotega eta Matagalpa.

Orain herritarrek berehalako laguntza behar dute. Romerok esan zuen batik bat botikak behar direla, baina baita bestelako gaiak ere. «Herritarrek eta Gobernuak botikak, jakiak eta arropa eskatzen ari dira. Eta etxebizitzaren solairuetan jartzeko zinka behar da».

Honduras «larri-larri» • Francisco Moralesek Hondurasko enbaxadoreak komunikabide honi adierazi dionez, egoera «larri-larria» da herrialdean. Zenbait iturritatik 500-600 hildako kopurua eman zen hasiera batean baina enbaxadoreak biktimak «askoz gehiago» direla agertu du. «Kolpe izugarria izan da; hurakanak, teoriarik, pasatu egin da baina eurijasek bere horretan segitzen dute etengabe», esan du.



El Salvadorko gizonezko bat, *Mitch* hurakanaren astinduen ondorioz hil den mutiko bati begira. WILLIAM AREVALO AP

HURAKANAREN NORABIDEA



Iturri beren arabera, lurren % 60 bat «suntsiturik edo urak hartuta» utzi ditu hurakanak. Errepideak eta komunikazio-gune garrantzitsuenak moztuta daude. Zubiak bertan behera erori dira eta bideak txiki-txiki eginda geratu. Mendebaldekoaldea zein ipar eta hegoaldearen arteko komunikazioa etenda dago Hondurasean. Carlos Flores lehendakariak salbuespen egoera dekretatu zuen atzo.

Tegucigalpa ordu latzak bizi-tzen ari da. Inguruko ibaiak gainez egin dute, eta Hondurasko hiriburuak ez du argindarrik. Telefono zerbitzuak ere arazo handiekin funtzionatzen ari dira. Beste hiri batzuek ere —Trujillo haien artean— galera handiak izan dituzte.

Hurakan eta euriteen ondorioak ez dira soil-soilik kontinente aldera mugatu, uharteetara ere ailegatu baitira. Badiako Uharteetan, esaterako, Guanaja hiria hartu du urak, Roatan uhartearen eta izen bereko hiriburuaren ere kalte izugarria egin du *Mitch*-ek.

Hondurasko ekonomiak biziki nozituko ditu tragedia natural honen ondorioak, batez ere nekazaritzak. Bertako baliabideen artean onarritakoak diren garau eta fruitu plantazioak —banana eta ananek—, batez ere— suntsitu egin dituzte euriteek. Uzta galdu egin da.

Guatemala eta El Salvador ere harrapatu ditu hurakanak, Guatemalan 82 lagun hil dira eta El Salvadorren 74, iturri ofizialen arabera.

Lau gobernuek batera egingo diote aurre hondamenari

NIKARAGUA, Honduras, Guatemala eta El Salvadorreko gobernuek bat egin zuten atzo nazioarteari laguntza eskatzeko. *Mitch* hurakanak hondamendia eragin du Erdialdeko Amerikako lau herrialde horietan, eta ezinbestekoa dute larrialdiko laguntza. Milaka herritar hil da, milaka geratu da etxebizitzarik gabe, ehunka zubi behera etorri dira eta errepide askok kalte handiak izan dituzte. Gainera, uzta asko galdu da lau estatuetan.

Erdialdeko Amerikaren Miami kontsulek ere batera ekin zioten lau herrialde horietara laguntza bidaltzeari. Concha Marina Ruizek, El Salvadorko kontsulak, adierazi zuen Erdialdeko Amerikako kontsul guztiak bilduta zeudela asteburuan laguntza nola bidali aztertzeke.

Nazio Batuetako Asanblea Orokorrak eta Kofi Annan idazkari nagusiak bilera egin zuten, eta atsekabea adierazi zieten herri kaltetuei. Annanek dolu-minak eman zizkien biktimen senideei, eta nazioarteari dei egin zion hurakanaren ondorioak konpontzeko baliagarri izango den laguntza eman dezaten.

Nazio Batuek aditu taldeak igorri zituzten Hondurase eta Nikaraguara, erakundeko boze-

ramaile Fred Eckhardek zehaztu zuenez. Talde horiek arduratuko dira kalteak zenbatzeaz eta laguntza nola bideratu zehazteaz.

Nazio Batuek kide diren herrialde eta erakunde guztiei eskatu zieten ahalik eta azkarren laguntzeko El Salvador, Guatemala, Honduras eta Nikaraguarri. Ildo horretan, Nazioarteko finantza erakundeetara ere jo zuten.

Mundu zabaleko herrialde eta erakunde ugari adierazi diete elkartasuna Erdialdeko Amerikako estatuei. Ugari dira horra laguntza bidaltzeko prestakizunak egiten ari diren erakundeak.

Euskal Herriak Honek erakunde ez gubernamentalak agiri bat igorri zien komunikabideei laguntza eskatzeko. Erakundearen hitzetan, ezinbestekoa da Ertamerikari laguntzea «mendeko hondamendi larriene-takotzat jo denaren» ondorioetatik osa dadin.

Espainiak jakiak banatu zituen Honduras eta Nikaraguan, Joaquín Pérez Villanueva Informazio Diplomatikoaren Bulegoak esan zuenez. Horrez gainera, herrialde horrek jakiak, arropa eta larrialdiko sendagaiak bidaliko ditu El Salvadorrera. ✕